

ЖАҢАЛЫҚТАР

Ақтөбе облысында үш көлік соқтығысты: үш адам қаза болды, жеті адам жарақаттанды

11 маусым 2026 жыл, 08:04



Ақтөбе – Астрахань тасжолында үш көлік соқтығысып, үш адам қаза болды, жеті адам жарақаттанды.

[Mgorod.kz](https://mgorod.kz) сайтының жазуынша, жол апаты 9 маусымда сағат 15:20 шамасында Ақтөбе облысы Байғанин ауданы Қарауылкелді ауылының маңында болған.

Алдын ала мәліметке қарағанда, DAF жүк көлігі мен екі Toyota Camry көлігі соқтығысқан. Соққыдан кейін жеңіл көліктердің бірі өртенген.

Жол апатының салдарынан екі адам оқиға орнында қаза болды. 8 адам ауруханаға жеткізілген. Кейін науқастардың бірі ауруханада көз жұмды.

Зардап шеккендерге көмектесу үшін Ақтөбеден Байғанин ауданына санитарлық авиация бригадасы жіберілгені хабарланды.

Жол апатына байланысты қылмыстық іс қозғалған. Тергеу жүріп жатыр.

Қазақстанда жылына 35-40 мың жол апаты тіркеледі. Ресми ақпаратқа қарағанда, жол апатына көп жағдайда маневр жасау ережесін бұзу, жаяу жүргіншілер мен өзге көліктерге жол бермеу, жылдамдықты асыру себеп болады.

Жол апатының салдарынан жылына 10-15 мың адам жарақат алады, 2 мыңға жуық адам опат болады.

Айдар

ЖАҢАЛЫҚТАР

ЖАЛПЫ АРХИВ